

Na osnovu člana 3. i člana 10. Zakona o zaštiti stanovništva od zaraznih bolesti („Službene novine FBiH“, broj 29/05), člana 8. Zakona o principima lokalne samouprave u Federaciji BiH („Službene novine FBiH“ broj: 49/06) i člana 35. Statuta Općine Konjic („Službeni Glasnik općine Konjic“ broj: 4/01, 5/04, 3/08), Općinsko vijeće na sjednici održanoj dana 8.07.2008. godine, *d o n o s i*

## **ODLUKU O SANITARNO-HIGIJENSKOM MINIMUMU**

### **I. OPŠTE ODREDBE**

#### Član 1.

U cilju zaštite zdravlja građana ovom Odlukom propisuju se sanitarno-higijenske mjere na području općine Konjic u oblastima koja nisu regulisana drugim propisima.

#### Član 2.

Sanitarno-higijenskim mjerama u smislu ove Odluke smatraju se:

- mjere za obezbjeđenje sanitarno-higijenskih uslova u objektima za proizvodnju i promet životnim namirnicama,
- mjere za obezbjeđenje sanitarno-higijenski uslova u objektima u kojima se pružaju higijenske usluge građanima i ostalim javnim objektima,
- mjere za obezbjeđenje sanitarno-higijenskih uslova kod izgradnje, postavljanja i čišćenja nužnika i đubretarnika, septičkih i osočnih jama,
- mjere za obezbjeđenje sanitarno-higijenskih uslova kod držanja domaćih životinja.

#### Član 3.

Pod objektima za proizvodnju i promet životnim namirnicama, te javnim i ostalim objektima u kojima se pružaju usluge građanima smatraju se svi objekti u kojima se vrši proizvodnja i promet životnih namirnica, te svi objekti u opštoj upotrebi u kojima građani zadovoljavaju svoje potrebe, kao što su: ugostiteljski, trgovački, zanatski, komunalno-saobraćajni, vaspitno-obrazovni, sportski, kulturni, rekreativni, zdravstveno-higijenski, objekti za igre na sreću i sl. objekti.

### **II. MJER ZA OBEZBJEĐENJE SANITARNO-HIGIJENSKI USLOVA U OBJEKTIMA ZA PROIZVODNJU I PROMET ŽIVOTNIH NAMIRNICA**

#### Član 4.

U objektima za proizvodnju i promet namirnica mora se najmanje jedanput dnevno, a prema potrebi i više puta vršiti čišćenje prostorija i sakupljanje smeća u zatvorene tipske posude koje stoje u namjenski odvojenoj ili izgrađenoj prostoriji.

Prostorije objekta iz stava 1. ovog člana moraju biti stalno čiste.

Njihovo krećenje se obavlja čim se za to ukaže potreba, a najmanje jednom godišnje.

#### Član 5.

Okolina objekta za promet i proizvodnju namirnica i pružanje ugostiteljskih usluga mora biti uredna.

Prilazi se moraju urediti tako da se ne stvaraju blato i prašina prilikom prolaza ili istovara ili utovara robe i ambalaže.

Zabranjeno je držanje ambalaže ( gajbi, sanduka, limenki, boca i sl.) na otvorenom prostoru u okolini objekta iz stava 1. ovog člana.

Prazna ambalaža do povratka mora se držati na odvojenom mjestu, u magacinu ili na stovarištu.

#### Član 6.

Voće i povrće u prodavnicama namirnica, ukoliko nije zapakovano, mora biti odvojeno po vertikalni od ostale industrijske i prehrambene robe ili odvojeno na posebnim tezgama i policama.

Sirovo meso u prodavnicama se drži odvojeno od suhomesnatih proizvoda i njime se manipuliše odvojeno od drugih prehrambenih artikala, uz obaveznu upotrebu posebnog pribora i uređaja.

#### Član 7.

U objektima za promet i proizvodnju namirnica, nezapakovane namirnice, izuzev voća i povrća, mogu se držati i izlagati samo u zatvorenim posudama ili odgovarajućim vitrinama gdje su zaštićene od prašine i drugih nehigijenskih postupaka.

Suhomesnate i mliječne proizvode, sirovo meso u polutkama ili siječeno na komade nije dozvoljeno izlagati na stolovima i u otvorenim izlozima, izuzev rashladnim zatvorenim izlozima i vitrinama i sl. kako ih potrošači ne bi mogli dodirivati rukom ili drugim predmetima ili na drugi način svojim prisustvom zagađivati.

Narezane suhomesnate proizvode, nezapakovane namirnice, izuzev voća i povrća, sirovo meso, hljeb i pecivo, kao i nenarezane suhomesnate proizvode smiju radnici u prometu dodirivati samo odgovarajućim čistim priborom: lopaticama, noževima, hvataljkama, viljuškom, kašikama, papirom i sl.

Nezapakovane namirnice se pri prodaji moraju obavezno zamotati u čist bijeli papir ili staviti u papirne kese, a proizvodi od mlijeka, mesa i sirovog mesa zamotati u masni bijeli papir ili celofan.

Hljeb i ostali pekarski proizvodi moraju se umotati cijelom svojoj dužinom u čist bijeli papir, a uzimanje i služenje istih vršiti posebnim zaštitnim rukavicama.

#### Član 8.

Uređaji i ostali pribor u prodavnicama namirnica moraju se svakog dana nakon završetka rada oprati toplom vodom i tekućom vodom i deterdžentom.

#### Član 9.

Radnici zaposleni u prodaji sirovog mesa, kao i na sječenju pečenog mesa, bureka, ćevapčića i drugih jela s roštilja u grilu i sličnim objektima u vrijeme prodaje, siječenje ili pripremanje ovih namirnica ne mogu vršiti naplatu u novcu niti rukovati novcem.

Odredba iz stava 1. ovog člana ne odnosi se na gril objekte u kojima se usluživanje vrši samo na šalteru, kao i na prodaju mesa i peradi u mješovitim prodavnicama, s tim da se meso ne smije dodirivati rukama.

#### Član 10.

Prodavnice mesa i mesnih proizvoda pored opštih moraju ispunjavati i slijedeće uslove:

1. moraju biti izgrađene od čvrstog materijala, zidovi u visini od 1,80 m, obloženi keramičkim pločicama, a pod izgrađen od podnih keramičkih pločica, brušenog betona ili sličnog materijala i odgovarajućim brojem slivnika,
2. objekat mora biti zaštićen od insekata i glodara,
3. pultovi za prodaju moraju biti prekriveni nerđajućim limom ili drugim materijalom koji se lako čisti,
4. kuke za vješanje mesa moraju biti niklovane ili izgrađene od nerđajućeg čelika. Kuke se mogu postavljati iza leđa prodavača, tako da su nedostupne potrošačima,
5. ukoliko se u istoj prodavnici prodaju suhomesnati proizvodi i ribe, onda se za svaku vrstu mora obezbjediti poseban pribor za sječenje,
6. meso i mesni proizvodi moraju se zavijati samo u celofan, polietilenske omote i vrećice,
7. poslije dnevne upotrebe panjevi se moraju oprati, sastrugati i posuti soli.

#### Član 11.

Mljeveno meso nije dozvoljeno držati u prodaji ni u objektu prodaje ni u uređajima za hlađenje i sl.

Mljevenje (usitnjavanje) mesa u prodaji, kao i njegovo sječenje na manje komade pogodno za mljevenje nije dozvoljeno prije zahtjeva potrošača.

Odredbe stava 1. ovog člana ne odnose se na mljeveno meso industrijski pakovano prema postojećim propisima o kvalitetu mesa.

#### Član 12.

Slastičarske i buregdžijske radnje moraju imati:

- prostoriju za usluživanje (prodavnica),
- radionicu,
- prostoriju za namirnice (ostavu)
- prostoriju za pranje suda ili odvojen prostor,
- prostoriju za odlaganje odjeće i obuće ili garderobne ormare koji ne smiju biti u ostavi ni u kuhinji.

Zidovi prostorija radnje iz stava 1. ovog člana, izuzev zidova prostorija za usluživanje, moraju biti obloženi keramičkim pločicama ili premazani svijetlom masnom bojom u visini od 1,80 m. Podovi radionice i prostorije za pranje suda moraju imati ugrađene slivnike za odvod otpadne vode.

Visina zidova mora iznositi najmanje 2,60 m.

#### Član 13.

Automatski elektrouređaji za hlađenje i točenje napitaka i izradu sladoleda moraju se držati u slastičarskim radnjama ili u tipiziranim kioscima koji su priključeni na gradsku električnu mrežu i u kojima je obezbjeđena tekuća hladna i topla voda.

#### Član 14.

U radnjama za pripremu i prodaju, kokica, kestenja i sličnih proizvoda ne može se vršiti prodaja namirnica proizvedenih i pakovanih na industrijski način: keks, bombone, slani štapići, čips, gume za žvakanje i slično.

#### Član 15.

Termička priprema kokica i sl. proizvoda kao i grijanje prostorija radnje za pripremu i prodaju istih proizvoda može se vršiti isključivo putem električnih ili plinskih peći, odnosno uređaja uz maksimalnu primjenu mjera sigurnosti.

Nisu dozvoljeni: priprema, pečenje, kuhanje kokica, kestenja, kukuruznih klipova, pomfrita i sl. proizvoda na otvorenom prostoru oko radnje, bez odobrenja za rad van poslovnih prostorija izdate od Službe za privredu i finansije i bez odobrenja za zauzimanje javne površine izdatog od Službe za prostorno uređenje, građenje i obnovu .

#### Član 16.

Radionice u kojima se izrađuju voćni i drugi bezalkoholni napici moraju imati radionicu, skladište i praonicu, te sanitarni čvor za uposleno osoblje.

Visina poslovnih prostorija mora iznositi najmanje 2,60 m, a zidovi 1,80 m moraju biti obloženi pločicama. Podovi moraju biti od vodonepropusnog materijala i sa slivnicima.

#### Član 17.

Promet životnih namirnica na pijacama pored opštih mora ispunjavati i slijedeće sanitarno-higijenske uslove:

1. pijačni prostor mora biti betoniran ili asfaltiran, održavati ga u čistom i urednom stanju i svakog dana nakon završetka pijačni prostor i stolove temeljito očistiti i oprati,
2. pijaca mora biti priključena na javnu vodovodnu i kanalizacionu mrežu, imati obezbeđenu pitku vodu i nužnik za žene i muškarce,
3. na pijaci mora biti postavljen dovoljan broj stolova za prodaju namirnica. Stolovi moraju biti građeni od materijala koji se lako čisti,
4. promet mlijeka, mliječnih proizvoda, masti i masla, te mesa, suhomesnatih proizvoda i ribe može se obavljati na posebno određenom dijelu pijace koji je prekriven i snadbijeven vitrinama (zatvorene tržnice).

### III. SANITARNO-HIGIJENSKI USLOVI I MJERE U OBJEKTIMA ZA PRUŽANJE HIGIJENSKIH USLUGA GRAĐANIMA I OSTALIM JAVNIM OBJEKTIMA

#### Član 18.

U brijачkim, frizerskim i kozmetičarskim radnjama svako radno mjesto mora imati najmanje 6 m<sup>2</sup> slobodne površine poda.

Visina zidova ne smije biti manja od 2,60 m.

Zidovi ispred radnih mjesta moraju biti obloženi keramičkim pločicama ili obojeni svijetlom masnom bojom u visini od 1,80 m.

Prostorije moraju imati poseban ulaz sa ulice ili osvijetljeni ulaz iz prolaza.

Svijetlosni koeficijent u brijачkim, frizerskim i kozmetičarskim radnjama i salonima ne može biti manji od 1:5.

#### Član 19.

U muškim frizerskim, odnosno brijачkim radnjama i salonima svako radno mjesto mora imati umivaonik sa tekućom toplom vodom i hladnom vodom.

U ženskim frizerskim radnjama moraju postojati najmanje dva umivaonika sa tekućom toplom i hladnom vodom, jedan u sastavu klozetskog predprostora, a jedan u radnji.

#### Član 20.

U brijачkim i frizerskim radnjama mora postojati higijenski nužnik za ispiranje vodom pod pritiskom sa predprostorom i uređajima za tekuću toplu i hladnu vodu.

Ventilacija klozetske kabine ne smije se vršiti putem predprostora i radnje.

Izuzetno muškim frizerima, odnosno brijaćima u postojećim radnjama u kojima se iz tehničkih razloga ne može dograditi nužnika s predprostorom mora se obezbijediti upotreba nužnika i higijenskih uređaja u neposrednoj blizini radnje.

#### Član 21.

Radnici i učesnici u brijачko-frizerskim radnjama moraju nositi iste mantile u boji kojom se prikriva nečistoća.

Izbor boje za radnje-radne mantile vrši vlasnik objekta.

#### Član 22.

Prije pružanja brijачko-frizerskih usluga, radnici, odnosno učesnik dužan je oprati ruke toplom vodom i sapunom.

Zastori koji štite korisnike za vrijeme svake upotrebe oprati, ukoliko nisu načinjene od materijala za jednokratnu upotrebu.

Na naslon za glavu stavlja se za svakog korisnika neupotrebljavani tanki bijeli papir, papirni ubrus ili sličan materijal za jednokratnu upotrebu.

#### Član 23.

Pribor koji dolazi na neposredan dodir sa kožom ili kosom korisnika mora se iza svakog korisnika putem potapanja ili ispiranja dezinfikovati sredstvima čija je upotreba odobrena.

Svakog dana nakon završetka rada pribor iz stava 1. ovog člana mora se očistiti, oprati i dezinfikovati sredstvima čija je upotreba odobrena.

Zabranjeno je sapiranje sapunice sa lica sunderom.

Zabranjeno je pružanje brijачkih i frizerskih usluga licima s vidljivim znacima oboljenja kože i kose.

#### Član 24.

Željezničke i polazne autobuske stanice moraju imati higijenske nužnike za muškarce i žene sa predprostorom, tekućom vodom, toaletnim priborom za jednokratnu upotrebu i u istim je obavezno prisustvo radnika na održavanju istog.

Nužnici se moraju svakog dana prati i dezinfikovati.

## Član 25.

Poslije svakog putovanja, saobraćajna sredstva za prevoz putnika moraju se temeljito očistiti, a najmanje jedanput sedmično dezinfikovati.

Vozila se moraju u toku 24 sata povremeno prozračiti.

U autobusima moraju postojati sredstva za dezodoraciju i PVC vrećice.

Putničke čekaonice moraju se zimi zagrijavati.

U prevoznim sredstvima i objektima prevozne djelatnosti u kojima se utvrdi prisustvo insekata (stjenice, buve, vaške i sl.) mora se odmah izvršiti dezinsekcija.

## Član 26.

Prostorija za publiku u bioskopu mora se prozračivati najmanje 15 minuta prije početka svake predstave.

U bioskopu moraju postojati muški i ženski higijenski nužnici i ispred prostora, sa tekućom vodom i toaletnim priborom za jednokratnu upotrebu.

Nužnici se moraju prati i dezinfikovati svakog dana.

Odredbe iz predhodnih stavova odnose se i na sve druge objekte u kojima se održavaju priredbe, predavanja, igranke, koncerti i sl.

## Član 27.

Prostorije školskih i predškolskih ustanova, kao i dr. prostorije u kojima učenici ili djeca obavezno provode određeno vrijeme moraju se svakog dana čistiti, namještaj svakodnevno posebnim krpama oprati i prostorije prozračivati.

Prostorije se moraju prozračivati između smjena u najkraćem trajanju od 15 minuta.

Zabranjeno je izuvanje učenika u školama.

Prostorije iz stava 1. ovog člana moraju imati higijenske nužnike sa priključkom na kanalizaciju, a ako nema kanalizacije mora imati higijenske nužnike sa septičkom jamom, s tim da u oba slučaja nužnici moraju imati po jednu kabinu na 20 učenika, odnosno djecu u jednoj smjeni.

Nužnici se moraju svakodnevno dezinfikovati i održavati u čistom stanju.

Prostorije iz stava 1. ovog člana moraju se temeljito čistiti i prema potrebi krečiti.

Septičke jame se moraju prazniti i čim se napune. A nakon čišćenja dezinfikovati.

Pražnjenje i dezinsekcija vrše se, po pravilu, u vrijeme školskog (zimskog ili ljetnjeg) odmora.

## Član 28.

U čekaonicama zdravstvenih organizacija, socijalnog osiguranja i drugih javnih organizacija, kao i u čekaonicama državnih organa mora postojati dovoljan broj stolica ili klupa za pacijente, odnosno stranke.

Prostorije iz predhodnog stava moraju se grijati u vrijeme i na način predviđen važećim propisima.

U prostorijama organizacija i organa iz stava 1. ovog člana moraju postojati higijenski klozeti s predprostorom, tekućom vodom i toaletnim priborom za jednokratnu upotrebu.

Prostorije organizacija i organa iz stava 1. ovog člana moraju se redovno čistiti i prema potrebi krečiti.

#### IV. MJERE ZA OBEZBJEĐENJE SANITARNO-HIGIJENSKIH USLOVA KOD IZGRADNJE, POSTAVLJANJA I ČIŠĆENJA NUŽNIKA I ĐUBRETARNIKA, SEPTIČKIH I OSOČNIH JAMA

## Član 29.

Na javnim mjestima i pri objektima u kojima se sakuplja više ljudi (pijace, igrališta, željezničke i autobuske stanice, izletišta i sl) moraju biti izgrađeni higijenski javni nužnici.

Javni nužnici moraju imati odvojene klozetske grupe za muškarce i žene, a u muškom dijelu moraju biti postavljeni pisoari.

Javni nužnici moraju biti priključeni na vodovod i kanalizaciju ako ove u mjestu postoje, a ako ne postoje javni nužnici mora imati ispravnu septičku jamu za uklanjanje izlučevina.

Javni nužnici moraju imati uredno ventilisane kabine, zidove do stropa obložene keramičkim pločicama, a podove od podnih keramičkih pločica ili drugog pogodnog vodonepropustivog materijala.

#### Član 30.

U sve septičke jame prije njihovog pražnjenja obavezno se sipa dovoljna količina hlomo krečnog mlijeka.

Crpljenje i čišćenje septičkih jama vrši se na način koji ne zagađuje okolinu.

Imalac septičke jame ili nužničke jame dužan je da Komunalnom preduzeću prijavi čišćenje kad se jama napuni do 2/3 od ukupne njene zapremine i ne smije dozvoliti da dođe do prelijevanja i iscjedivanja sadržaja iz jame.

Na području općine Konjic gdje je omogućen pristup vozila pražnjenje septičkih jama i odvoz fekalnih masa može vršiti samo ovlašteno komunalno preduzeće specijalnim vozilima (cisternama).

Na urbanom području grada fekalije se istresaju u gradsku kanalizaciju najmanjeg profila 500 mm na šahtu koji odredi sanitarna inspekcija i preduzeće koje održava kanalizaciju.

Poslije svakog istresanja fekalija okolina šahta se mora očistiti i dezinfikovati.

#### Član 31.

Iznošenje fekalija na zemljištu ostalih urbanih područja općine i istresanje iz specijalnih vozila može se izuzetno vštiti pod slijedećim uslovima:

1. da se dobije pristanak vlasnika, odnosno korisnika zemljišta,
2. da se istresanje fekalija vrši samo zimi u periodu novembar-februar,
3. da oko odobrenog zemljišta za istresanje fekalija nema podzemnih i površinskih voda u krugu od najmanje 50 m.
4. da se odobreno zemljište najmanje godinu dana od posljednjeg istresanja fekalija ne koristi za gajenje povrća,
5. da oko odobrenog zemljišta nema stambenih zgrada i poslovnih objekata na udaljenosti 50 m, kao i da je odobreno zemljište udaljeno od puteva najmanje 30 m.
6. da se odobreno zemljište za istresanje fekalija može koristiti samo jednu zimu.

#### Član 32.

Svaka stambena zgrada, svako domaćinstvo, svaka poslovna prostorija moraju imati izgrađen higijenski nužnik.

U stambenim i poslovnim prostorijama koje posjeduju vodovod i kanalizaciju, nužnici moraju imati sistem za ispiranje.

U naseljenim mjestima, na području općine Konjic koja imaju kanalizaciju, zgrade namijenjene za stanovanje, poslovne prostorije i javni nužnici moraju biti priključeni na kanalizacionu mrežu. Ukoliko zbog konfiguracije terena ili drugih uslova nije moguće izvršiti priključak nužnika u kanalizaciju, odnosno gdje ne postoji vodovod i kanalizacija, objekti iz stava 1 ovog člana moraju se priključiti na septičke jame. Septičke jame moraju biti izgrađene po svim propisanim tehničko-higijenskim uslovima i redovno se održavati.

Ukoliko je dozvoljeno da se nužnici grade van zgrade ili su već izgrađeni u momentu stupanja na snagu ove odluke, moraju biti od tvrdog materijala, imati nužničku kabinu, biti priključeni na kanalizaciju ili propisno izgrađenu septičku jamu i redovno se održavati.

#### Član 33.

Zabranjeno je podizanje nužnika pored puteva, u blizini bunara, izvorišta i u blizini stambenih i poslovnih zgrada.

Nužnici se mogu graditi samo nizvodno od izvorišta bunara i drugog vodovodnog objekta u pravcu podzemnog toka vode.

Udaljenost nužnika od javnih puteva i susjednih stambenih, poslovnih i javnih zgrada i objekata za proizvodnju i promet životnih namirnica ne smije biti manji od 15 m. Izuzetno, udaljenost iz predhodnog stava može biti i manja ukoliko to dozvoljava situacija na terenu, što zapisnički određuje sanitarni inspektor.

#### Član 34.

Zabranjuje se istresanje fekalija iz nužnika i septičkih jama na javne površine, u rijeke i potoke.

#### Član 35.

Prilikom izgradnje nužnika u naseljima gdje nema vodovodne i kanalizacione mreže moraju biti ispunjeni slijedeći minimalni uslovi:

1. nužnik mora imati nužničku jamu iz koje ne može oticati nužnička osoka kroz zemlju niti po zemlji,
2. nužnička jama mora biti pokrivena betonskom pločom,
3. u gradu Konjic, kao i u naseljenim mjestima sa većom gustom naseljenosti, obavezno je graditi nužnik sa najmanje trodijelnom jamom i cementnom glazurom,
4. nužnik mora biti solidno izgrađen od cigle, betonskih elemenata ili drugog sličnog materijala i pokriven crijepom ili salonitom, sa vratima koja se dobro zatvaraju,
5. na području općine Konjic gdje postoji vodovodna i kanalizaciona mreža, nužnici sagrađeni izvan stambenih ili poslovnih objekata moraju biti priključeni na kanalizacionu i vodovodnu mrežu,
6. nužnik ne smije biti postavljen iznad i u blizini od 30 metara do vodoopskrbnih objekata.

#### Član 36.

Nužnici, objekti za stoku, kokošinjci, šupe i đubretarnici moraju biti postavljeni u dubini vlastitog dvorišta, udaljeni od susjednih objekata i saobraćajnice, te u pozadini najmanje 15 x 15 metara, tako da ne smetaju stanarima susjednih objekata i da ne kvare izgled mjesta. Objekti za stoku moraju imati đubrišne i osočne jame od nepropusnog tvrdog materijala - betona i njihov sadržaj se ne smije rasipati izvan jame.

Pražnjenje đubretarnika i osočnih jama mora se vršiti na higijenski način koji isključuje mogućnost zagađenja.

Objekti za stoku moraju se održavati u čistom stanju.

Pražnjenje jame vršit će se kad se napuni do 2/3 od ukupne zapremine jame.

### V. MJERE ZA OBEZBJEĐENJE SANITARNO-HIGIJENSKIH USLOVA KOD DRŽANJA DOMAĆIH ŽIVOTINJA

#### Član 37.

U užem urbanom području grada Konjica zabranjeno je držanje domaćih životinja. u ulicama: M. Tita, Trg državnosti Alije Izetbegović, Željezničkoj ulici, Pave Anđelić, 4. Muslimanske, Civilnih žrtava rata, Luka, Donje polje, Kolonija, Varda, Bolnička, Treći mart, naselje Tuleg, Huseinbegova, Stara Čaršija, Zuke Džumhur, Prkanj, Žabnjak, Hadžizulfikara, Orašje, Zelenih beretki, Zlatrgovina do Kapele, Sarajevska do iza DC. Mostarska do ugostiteljskog objekta "Jezero", Omladinska, Pleha, Suhi do, Musala, Kasima Prohića, Šehidska, Konjičkog bataljona, Žabljak, Tuščica (do mosta na rijeci Bjela), a naselje Tuščica prema Turiji do prve kaskade na potoku Tuščica, te u pojasu Boračko jezero od ulaznog glavnog raskršća puta za Glavatičevo do sela Jezero.

Vlasnici domaćih životinja izvan zone zabrane držanja, mogu držati domaće životinje samo pod slijedećim uslovima:

- Kokošinjac, tor ili štala (gospodarski objekat) mora biti odgovarajuće izgrađen, u svom sastavu mora imati izgrađen đubretarnik, osočnu jamu, tor i dr.
- Gospodarski objekat mora biti udaljen 15 metara od puta i 15 metara od susjednog objekta,
- Neposredna okolina mora biti uvijek besprijekorno čista i dezinficirana,
- Đubrivo-izmet odlagati isključivo na odgovarajući način propisan ovom Odlukom.

#### Član 38.

U užem urbanom području grada Konjica dozvoljava se držanje pasa pod slijedećim uslovima:

- da vlasnik posjeduje odobrenje za držanje pasa,
  - da psi moraju biti vezani,
  - da posjeduju svoj pedigre (rodovnik),
  - da moraju biti cijepljeni protiv bjesnila i dr zaraznih bolesti.
  - da postoji ograđeno dvorište odvojeno od ulice i susjednih objekata
  - da se psi moraju držati u kućicama koje moraju biti udaljene od stambenih zgrada, ulica ili vodovodnih objekata najmanje 10 m u prostoru zatvorenom od ulice
- Odobrenje za držanje pasa izdaje veterinarski ili sanitarni inspektor.  
Objekti za pse moraju se držati u čistom stanju i povremeno dezinficirati.  
Zabranjeno je puštanje pasa da se slobodno kreću po gradu Konjicu i ostalim naseljima na području općine.  
Prilikom izvođenja pasa na šetnju obavezna je zaštitna brnjica I da su vezani.

#### Član 39

Držanje kućnih ljubimaca, ukrasnih životinja i ptica u stambenim i poslovnim zgradama i prostorijama dozvoljeno je pod uvjetom da se ne remeti javni red i mir građana i korisnika poslovnog prostora i ako to nije protivno higijensko-sanitarnim propisima.

#### Član 40.

Zabranjeno je držanje stoke, svinja i peradi u stambenim zgradama na čitavom području općine.

#### Član 41.

Izgradnja gospodarskih objekata na užem urbanom području grada Konjic nije dozvoljena, izuzev u ulicama u kojima je dozvoljeno držanje domaćih životinja.  
Pod gospodarskim objektima u smislu ove Odluke podrazumijevaju se štale, svinjci, kokošinje, peradarnici, kućice za pse, sušare i sl...

#### Član 42.

Izgradnja štala, svinjaca, kokošinjaca i sl. objekata, ne može se vršiti uz stambene zgrade, odnosno na odstojanju manjem od 15 m od stambenih objekata i javnih puteva i 30 m od objekata za snadbjevanje vodom za piće (bunar, izvorište i sl).  
Objekti namjenjeni držanju većeg broja životinja-farme, kao i prateći objekti (đubretarnici i osočne jame) moraju biti udaljeni od susjednih objekata najmanje 100 m, a od susjednih parcela najmanje 20 m.  
Zabranjeno je okretanje ventilacionih otvora prema susjednim objektima i parcelama koje se nalaze na minimalnoj udaljenosti određenoj u stavu 1. i 2. ove odluke.

#### Član 43.

Štale, svinjci, peradarnici moraju se držati u čistom i urednom stanju. Svako domaćinstvo koje drži stoku mora imati uz gospodarski objekat izgrađene đubrišne jame od tvrdog vodonepropustivog materijala (beton, kamen, opeka) sa betonskim dnom.



Uz đubrišne jame moraju se izgraditi i manja nepropusna jama sa većom dubinom za skupljanje štalske osoke.

Đubrišna jama mora biti povezana sa štalom posebnim zatvorenim kanalima koji će obezbjeđiti oticanje osoke iz štale na đubrište i spriječiti njeno dalje oticanje osoke po okolnom zemljištu.

Đubrišne jame i jame za skupljanje osoke moraju biti natkrivene i obezbjeđene od nekontrolisanog pristupa ljudi i životinja.

#### Član 44.

Pse lualice u užem urbanom području grada Konjica uništavat će pravno ili fizičko lice kome se povjere ti poslovi, pod nadzorom veterinarskog ili sanitarnog inspektora.

Uginule pse kao i zgažene životinje dužno je odmah iz naselja i sa saobraćajnica ukloniti komunalno preduzeće i izvršiti njihovo zakopavanje na stočnom groblju.

Troškovi neškodljivog uklanjanja, sakupljanja, odvožnja i zakopavanja pasa lualica snosi Općina Konjic, a finansirat će se iz budžeta Općine.

#### Član 45.

Organizacija i način neškodljivog uklanjanja životinjskih leševa, konfiskata i otpadaka na području Općine regulisano je posebnom odlukom ( "Službeni Glasnik Općine Konjic", broj: 1/2000).

### VI. DEZINFEKCIJA , DEZINSEKCIJA I DERATIZACIJA (DDD)

#### Član 46.

U svrhu zaštite zdravlja građana i stvaranja uvjeta za svakodnevni normalan život i smanjenja ekonomskih i materijalnih šteta, tokom godine se obavlja obvezno dva puta sistematska dezinfekcija, deratizacija i dezinfekcija (DDD) javnih površina, kanalizacijskog sistema, javnih objekata, svih privrednih preduzeća, trgovačkih i ugostiteljskih poslovnih prostorija, javnih ustanova, svih stambenih zgrada i objekata.

U sprovođenju mjera DDD obaveza je svih privrednih, poslovnih i javnih subjekata i objekata kao i građana.

#### Član 47.

Pod pojmom sistematske dezinfekcije podrazumijeva se prskanje ili zamagljivanje odgovarajućim sredstvima u cilju uništavanja komaraca, muha i drugih insekata.

Pod pojmom sistematske deratizacije podrazumijeva se postavljanje odgovarajućih mamaka za uništavanje miševa, štakora i drugih glodara, te prikupljanje i odstranjivanje uništenih i uginulih glodara i drugih životinja.

Pod pojmom sistematske dezinfekcije podrazumijeva se prskanje ili pranje odgovarajućim sredstvom prostorija, objekata, predmeta, javnih površina, šumskih i livadskih površina i drugo, u cilju sprečavanja pojava širenja zaraznih oboljenja, sanacije određene lokacije ili objekta nakon određenih događanja koje zahtijevaju vršenje sprovođenja dezinfekcionih mjera i radnji.

#### Član 48.

Opseg, način, vrijeme izvođenja i ostali uvjeti obvezne sistematske DDD utvrđuju se operativnim planom, koji donosi Općinski načelnik po prijedlogu sanitarne ili veterinarske inspekcije.

Troškove obvezne sistematske DDD snose korisnici ili vlasnici poslovnih prostorija ili prostora.

Pravno ili fizičko lice, kome su povjereni poslovi DDD, dužni su prije početka izvođenja radova izvijestiti građane putem sredstava javnog informisanja o početku i završetku tih radova.

DDD mjere se vrše 2 (dva) puta godišnje.

## VII. NADZOR

### Član 49.

Nadzor nad izvršavanjem odredaba ove Odluke vrši sanitarna i veterinarska inspekcija.

## VIII. KAZNE NE ODREDBE

### Član 50.

Novčanom kaznom od 300,00 KM do 1.000,00 KM kazniće se za prekršaj privredno društvo i drugo pravno lice ako povrijedi odredbe članova: 4., 5., 6., 7., 8., 9., 10., 11., 12., 13., 14., 15., 16., 17., 18., 19., 20., 21., 22., 23., 24., 25., 26., 27., 28., 29., 30., 31., 32., 33., 34., 35., 36., 37., 38., 39., 40., 41., 42., 43. i člana 44.,

Novčanom kaznom od 100,00 KM do 500,00 KM kaznit će se za prekršaj iz predhodnog stava i odgovorno lice u pravnom licu, kao i građanin.

Novčanom kaznom u iznosu od 100,00 do 800,00 KM kaznit će se za prekršaj iz stava 1. ovog člana i lice koje obavlja samostalnu djelatnost (samostalni privrednik)

### Član 51.

Novčanom kaznom u iznosu od 500,00 do 2.000,00 KM kaznit će se za prekršaj privredno društvo i drugo pravno lice ako ne izvršava obaveze sprovođenja DDD iz člana 46. stav 2.,

A kaznom u iznosu od 100,00 do 1.000,00 KM lice koje samostalno obavlja djelatnost ako ne izvršava obaveze sprovođenja DDD iz člana 46. stav 2. .

Novčanom kaznom od 100 do 500 KM kaznit će se za prekršaj iz predhodnog stava i odgovorno lice u pravnom licu, kao i građanin.

### Član 52.

Novčanom kaznom od 500,00 KM kazniće se za prekršaj pravno lice ako u određenom roku ne postupi po rjesenju nadležnog Općinskog inspektora.

Za prekršaje iz predhodnog stava kaznit će se i odgovorno lice u pravnom licu i lice koje obavlja samostalnu djelatnost (samostalni privrednik) kao i građani u iznosu od 250,00 KM.

## IX. PRELAZNE I ZAVRŠNE ODREDBE

### Član 53.

Danom stupanja na snagu ove Odluke prestaje da važi Odluka o sanitarno-higijenskom minimumu broj: 01-023-59/90 ("Službeni glasnik Općine Konjic", broj: 4/90 i 1/00.)

### Član 54.

Ova Odluka stupa na snagu osmog dana od dana objavljivanja u "Službenom glasniku općine Konjic" i ima se objaviti na Oglasnoj tabli Općine Konjic.

Broj: 03-05-12-1666/08.  
Konjic, 8.07.2008. godine

PREDSJEDNIK  
OPĆINSKOG VIJEĆA  
Živana Hadžizukić, dipl.ing.građ.,s.r.